

晉溪本兵敷奏

晉書卷五

陝西延寧類下

爲計處邊務事

看得御史程啟充奏稱往年虜賊河凍則住牧冰解則北渡今乃據有其地數年于茲禍機隱伏識者寒心於時去總制以建提督議者以爲無益成敗三邊兵馬人各自擁勢分力弱不相爲用八營固原適平隴西鳳之衝陝西鎮巡高居省城遙制可否卒然有如前日之虜乘虛旁午其利害得失何如宜令陝西巡撫總兵住劄固原以扼其吭復設總制慎選才德

係天下之望者任之俾之經畧邊務整理兵食一節
查得自永樂宣德以來因各邊地方廣闊每鎮差都
御史一員巡撫並無總制之名成化十年刑部主事
張鼎建議創設總制

朝廷特改叅贊軍務左都御史王越總督軍務於固
原住劄亦無總制之號至弘治十年復起王越始令
總制甘涼各路邊務又恐事有掣肘就令王越兼巡
撫甘肅地方取回原設巡撫都御史吳珉別用初無
一官總制三邊之理亦無總制巡撫二官並設之例被
時王越專制一邊尚無成功自後承訛襲謬添設總

制三邊官員才寬死於鋒鏑張泰卒於憂勞多無成
効去年二月以兵部侍郎鄧璋陞右都御史總制陝
西軍務又自江西賑濟取回以諸臣之中而特舉鄧
璋可謂極天下之選又奪拯溺救焚之命不計數千
里往返之難乃自江西取回可見廷臣堪總制之任
者無出鄧璋又慮甘肅危急恐鄧璋一人顧理不周
復

命都御史彭澤總督甘肅等處軍務與鄧璋頡頏行
事可謂夾輔之有其人又因差總制而驟陞右都御
史其職不為不崇以一人而遙制三邊其權不為不

重自去年三月以至今日其任不為不久而固原隴
州殺掠之禍前此未有如今日之甚者由是觀之總
制之設無補於事已有明驗况鄧璋調用延綏軍馬
既不能為固原之助翻失延綏之守而巡撫陝西侍
郎馮清因專任總制難於自效無所設施鄧璋當虜
寇內侵時勢各危急之際方請于

朝欲專設巡撫於固原駐劄以分已責奏疏未至而
固原平涼已盡被蹂躪矣傳曰閫以外將軍制之又
曰在將軍君命有所不受言用兵機實不可少有牽
制今以三邊數千里之軍務而獨稟令于一人臣等

固知其不可也今都御史鄧璋總制失事去任未幾而復設總制以踵其失臣等若不援引故實極陳利害萬一復設總制於陝西自此諸邊戎務互相掣肘彼此牽制將來失機誤事係於天下

國家之利害非淺淺也況陝西套賊近已過河東行合無遵守

舊制再不必添設總制官員如遇賊情重大

命將出師自依常例差遣事畢回京其陝西事情仍行巡撫都御史蕭翀陳璘邊憲李昆四人各照地方會同鎮守總兵等官經畧邊務整理兵食交界地方

應該會合截殺去處依律會合策應不許自分彼此
互相推託失誤事機其甘肅哈密土魯番事情及也
克力亦不刺等賊情就着彼處鎮巡官查照本部節
次題准事理用心籌畫整飭防禦賊勢重大應調寧
夏等處軍馬計議停當酌量調取悉依原擬施行其
巡撫陝西都御史住劄固原已奉有

旨并總兵官趙文見在固原住劄外別無定奪正德
十二年正月 日具題奉

聖旨是欽此

為議處邊情事

看得巡撫寧夏都御史邊憲等奏要本部從長計議
查照弘治十四年

欽命內外大臣統調京邊官軍二萬在於寧夏辦鹽
池下營事例及照弘治十八年總制都御史楊一清
分布將官事例請

命督軍大臣一員兼程前去三鎮適中處所經畫議
處預防虜患一節查得弘治十四年差太監苗達都
御史史琳總兵官朱永征西之時糜費鉅萬未見成
功弘治十八年都御史楊一清承委總制事多紛更
亦無實效况近年添設總制失誤事機衆所共知已

經本部查議明白屢奉

欽依通行遵守擅難別議及照都御史邊憲不以本鎮分內防禦事宜陳奏却乃故為異同沮撓國是雖由私淑之誤終涉附會之嫌至於所奏脩舉廢墜相機戰守之說正邊憲職分當為乃託空言委諸督軍大臣似於邊務有所推託况前年虜寇由花馬池地方深入固原隴州搶殺彼時已有總制官在固原邊憲在寧夏不能協謀禦虜見今戴罪聽叅乃隱其誤事之迹復陳設官之議似此識見難委邊方重任但本官見已陞任合無本部行文新任巡撫寧夏都御

史鄭陽會同缺巡等官查照本部節次題奉

欽依內事理及欽奉

勅旨用心逐一遵依務在武備脩舉軍威振揚防禦
虞寇保障邊疆凡事悉遵舊規不許妄議更張以後
河開虜衆住套不出哨探的確星馳具奏應否

命將出師本部臨時斟酌議奏定奪其所奏缺少馬
匹一節合無本部移咨都察院轉行巡茶御史查照
舊例撥發如有多餘相應添撥給軍騎操就便從宜
添撥具奏查考及稱本鎮錢糧缺之過訾誤事一節
誠為切實急當區處合無本部移咨戶部上緊查議

區處覆奏定奪庶不臨期調軍失誤供給正德十二年正月十七日具題奉

聖旨是欽此

為預防虜患事

看得巡撫陝西都御史蕭翀奏稱該管地方固原一帶委的兵寡戰守不敷及原有備冬召募舍餘土達民壯人等六千餘名近因有例除豁到邊止有三分之一奏要本部從長計議將備冬舍餘人等行令守巡官清解赴邊收操及稱虜衆河開住套不出暫將平涼原調莊浪備禦官軍存留固原各城堡住劄防

守再將甘涼新遊兵內暫調一枝前來蘭州分布防禦候虜衆出查照舊各回地方一節查得前項御史馮時雍原奏召募軍人丁絕不必另勾旁枝今因此例一開止有三分之一到邊若不再行議處清解固原等處地方廣闊將何防守況土兵最爲得用又係原額之數合無依其所奏行文陝西都御史責委守巡等官將前項原額召募軍人除丁盡戶絕外但戶內見有精壯殷實人丁空閒別無差占即便僉解補役仍須量貼軍裝處置得宜毋容吏胥乘機詐騙並各地方清解畢具奏查考及照黃河凍開在邇陝

西巡撫官務要移文延寧二鎮查勘的確如果虜賊
住套不出就便依擬將平涼原調莊浪備禦官軍存
留固原各城堡住劄防守行文甘肅鎮巡官查勘本
邊事寧將本鎮遊奇兵量調一枝蘭州防禦如甘肅
事未寧息不許動調臣等又議得調兵當審時宜最
忌偏執牽制見今甘肅四賊大舉入寇都御史李昆
等奏要調陝西寧夏等處官軍應援今巡撫都御史
蕭紳慮恐套賊侵犯又奏要存留莊浪備禦及調甘
涼奇遊兵一枝前來蘭州防禦若非早為議定必致
臨期誤事合無本部通行陝西延綏寧夏甘肅鎮巡

官知會若遇河開探得達賊如果出套過河除延綏
奇遊兵照例宣大策應外其餘悉聽甘肅鎮巡官調
取應援若甘肅回賊已返黃河套賊不出其甘肅遊
奇兵亦聽巡撫陝西都御史量調附近邊方策應若
黃河套賊既不過河甘肅賊情又未寧息方聽各鎮
自為防禦不必互相調取兩相妨誤但三邊往返數
千餘里彼此消息急不得知務須不時移文遞相傳
報同心協力共濟時艱如或寡謀輕率兵不應調而
擅調浪費錢糧或兵不當離而擅離致破城寨罪坐
所由法不輕貸正德十二年二月初七日具題奉

聖旨是這備冬舍餘人等准照舊清理牧操調兵策應事宜便行與鎮巡等官都着依擬行欽此

為緊急聲息事

看得巡撫陝西都御史蕭翀等奏稱正德十一年十二月十三日有大勢達賊從番族列咂往南行走十四日進入列咂等族地方十五日侵入惡藏腦住劄一節顯是西海等處達賊過河侵犯洮岷地方但未知河水已開此賊何處向往見今甘肅有事倘此賊衆復回河西恐與回賊連合大擾甘肅固為可慮若又住河東不回則洮岷地方亦又受害難為防禦見

今甘肅都御史李昆等行文來調已革任副總兵鄭卿所管洮岷人馬若此大勢達賊尚在列咄等番族搶掠未回洮岷人馬自顧不暇豈得前去甘肅應援當此之時陝西各邊師役並興腹裏地方民困已極各該鎮巡官員俱受

朝廷重託關繫安危正宜同心戮力共濟時難合無本部行文巡撫都御史蕭紳等查勘大勢達賊如果見在番族列咄搶掠未曾過河嚴督兵備副使李璋整朔洮岷河三處人馬振揚軍威相機戰守應有用兵事宜火速議處施行若達賊已過河西亦就挑選

精銳慣戰官軍并管領頭目給與賞賜盛甲什物聽候征西平虜將軍邵永等調取甘肅截殺再行延綏寧夏甘肅陝西四處鎮巡官比常十分加謹洗心滌慮撫恤軍民防危慮患不許一毫科歛霍害激變地方敢有故違事有實蹟巡按御史即時具奏治以重罪仍將所部軍馬應給衣糧如法訓練固結人心振揚威武本邊有事自為防禦別邊有事刻期應援互相傳報彼此協和務使邊夷畏遁地方寧謐斯稱委任如或似常玩愒致使武備廢弛號令不行任情科害人心辭叛有壞地方急難救濟事必有由

國法難違其兵備副使李璋仍將達賊有無過河緣
由上緊具奏查考正德十二年二月初八日具題奉
聖旨是陝西地方今用兵之際恁部裏便行文與各
該鎮巡等官都着禁科害給衣糧固人心振威武相
機戰守刻期應援毋得自分彼此致誤事機其餘事
宜各依擬行欽此

為預防虜患事

看得巡撫陝西都御史蕭翀等奏要查照先年添設
哈振守備事例於平涼府暫設守備官員一以管束
衛所官軍一以護衛各

王府第就舉指揮同知夏欽都指揮孫昌堪任待虜
賊出套地方寧靖具奏裁革一節查得先年事例哈
振原係涼州領班都指揮暫留守備平涼地方不係
添設其所管舍餘民壯旗校不過一千四百一十九
員名各止為防禦本處盜賊不為防禦住套虜賊又
查得見今各處守備指揮恤軍息盜者少科歛害人
者多平涼府自來不設守備今若一旦添設誠恐住
套虜賊大舉入寇不能防禦創立新法勾擾軍民反
為地方之害況事干護衛群牧所尤為掣肘又今甘
肅有事涼州備禦官軍豈可輕掣事若謹始擅難准

設合無本部行文陝西鎮巡官嚴督守巡等官常行
巡歷提調平涼府衛掌印巡捕等官將原設操守官
軍舍餘民兵人等時加訓練督令緝捕盜賊撫安地
方其郡王將軍以下如有出城生事者照例禁止若
遇虜賊住套勢將入寇即照本部奏准事理整飭所
部官軍加謹防禦及會各路官軍併力戰守行令守
巡官暫住平涼提督軍衛有司及護衛官軍民兵協
同防禦事寧照舊正德十二年三月初七日具題奉
聖旨是這該道守巡官着輪流一人常在平涼居住
以便提督防禦每三箇月一替不許違誤事寧照舊

欽此

為黃河結凍事

看得巡撫延綏都御史陳璘咨報哨探得定邊等營
連賊不時出沒一節顯是大勢虜寇在套住牧即今
五六月後草盛馬肥便於馳騁未忝在野利於深入
必將犯我環慶入我陜隴如正德十年之事前項分
布防禦事宜雖經本部奏行遵守但恐各官狃於故
常視為虛文先事不能為備臨事倉卒失措軍民受
害咎將誰歸合無本部再行申明行文與陝西延綏
寧夏巡撫都御史即會鎮守太監總兵官查照本部

節次題隄事理預為提備相機戰守仍查所調軍馬
經行住劄要害城堡糧草有無充積勾用馬匹應否
取便牧放軍馬疲憊應該作何整理糧草缺乏應該
作何轉運并一應戰守事宜應具奏者計議停當星
夜具奏定奪應施行者就彼從宜施行不許持疑兩
端展轉奏請致誤軍機各將議處禦虜方畧差人資
奏查考本部再行宣大各鎮巡官知會查勘本邊賊
情稍緩將遊奇人馬整點齊備以待延綏有警調用
如本邊亦報有警哨探得實一面報知延綏并山西
三關鎮巡官查照一面具實奏聞正德十二年五月

十六日具題奉

聖旨是這防邊各項事宜着各該鎮巡等官都依擬行不許違誤欽此

為防邊事

看得陝西巡茶御史李素奏要本部查照先年差官事例暫設總制選才德係天下之望者任之坐以蘭州住劄控制三邊之兵督理八府之賦往來甘肅等處經畧整理一節查得陝西三邊各設巡撫係是舊規又於巡撫之外添設總制係是新例弘治年間暫設左都御史王越總制甘涼等處軍務將巡撫甘肅

都御史吳珉取回其後王越無功裁革照舊專任巡撫近於正德八年暫設都御史鄧璋總制三邊又設都御史彭澤總督軍務鄧璋固原失事彭澤遣使與土魯番講好未寧先回致有殺死芮寧侵犯肅州之禍今若再照前例暫設總制官員必致政出多門地方誤事事屬更張難擅依擬其奏要動支侍郎楊旦帶去官銀糴買糧餉一節已該戶部會議奏准施行別難再議及奏稱土魯番既已退避今復出將郡縣苦之尤甚宜盡徵還以休息民力一節深爲有理但邵永等俱已取回不去及查勘甘肅失事守臣見有

差官在彼俱別無施行其奏要將巡撫陝西都御史蕭翀亟加罷黜以安地方一節查得蕭翀見已陞任不在陝西合無行移吏部查奏定奪正德十二年八月初九日具題奉

聖旨是蕭翀已陞任了罷欽此

爲瞭見境外煙火達賊掏邊入境事

看得巡撫延綏都御史陳璘等奏稱斷頭山背陰水先結凍之處虜賊過河入套先遣輕騎精兵探我虛實侵犯之舉期在旦夕本鎮竒遊援兵四枝俱調宣大策應所遺老家人馬不多倘遇侵犯無兵可恃乞

要本部從長計議早賜督發回鎮分布防守一節照得即今黃河凍合虜賊擁衆入套住牧理所必有延綏一鎮人馬既已盡數調來大同等處設使北虜覬知虛實突入延綏環慶固原一帶地方無兵防禦失機誤事貽患匪輕合無本部馬上差人賫文交與宣大鎮巡官將原調延綏人馬盡數發回本鎮防禦不許推託遲延致誤事機然有所歸各將回兵日期具奏查考正德十二年十二月二十三日具題奉聖旨是欽此

爲預防虜患事

議得先事貴於預防有備乃可無患竊料北虜大勢
達賊近日在於大同應州等處搶掠被我官軍追逐
出境誠恐以後黃河凍合入套住牧必爲患於陝西
若不早爲預虞一旦有警未免失措臣等謹將預防
虜患事件開陳明白伏乞

聖裁內分布事宜合無通行延綏寧夏陝西各該鎮
巡官從長再議如果相應依擬分布隄備若別有常
策難拘一定徑自隨宜施行惟在謀筭預定布置得
宜逆折虜謀不得深入斯稱委任如或似常玩忽以
致緩急無備失誤軍機 國典具存必難輕貸今將

議擬預防虜患事件開坐正德十二年十月三十日
具題正德十三年二月初十日奉

聖旨今河凍已開恁所擬預防虜患事宜還議處了
來說欽此

計開

一禦虜當謹分布查得延綏寧夏二邊相連千
有餘里中間必有虜衆出入要害之處及有
城堡屯聚兵糧之處必須預先分布官軍在
彼住劄庶便進止若旣已分布其領兵將官
又須聽其自爲謀畫或遠或近相機行事不

必遙制庶所布將官得以自盡其能合無待
後黃河凍開虜賊住套春深草長勢將深入
之時將朱鑾杭雄周政劉玉分布延綏西界
安邊營等處紀世楹馮大經以次分布而東
各擇便利城堡住劄柳湧住守鎮城相機發
兵寧夏地方總兵官安國守鎮城副總兵路
瑛遊擊李永定俱來清水營花馬池定邊營
高橋兒等處通年大虜經行地方住劄與東
路叅將各整搦軍馬多方哨探遇有聲息互
相傳報不拘遠近相機應援不許指以稟受

節制爲由故意逗遛縣避致誤軍機固原一帶地方總兵官趙文與都御史鄭陽佐劄計議防禦方畧若趙文部下分管千總把總等官不得其人聽各官會同舉保謀勇慣戰官員委用軍馬數少作急區畫議奏定奪

一禦虜當謹徵調查得正德十年延綏人馬通調固原爲因分布不定遙制不專以致失事宣大遊兵調去延綏到遲亦未成功合無本部今年通行宣府大同延綏三處鎮巡官將各管遊奇兵馬預行號令整擗若虜不過河

則延綏聽大同調用如河開住套則宣大聽
延綏調用其取調之時務要查照往年事例
斟酌目前時宜既不可早調坐費糧草亦不
可後時失誤事機違者照依律例從重治罪
一用兵當備軍餉查得各邊主兵月糧頗勾支
持但遇調兵輒稱缺乏若不預先計處倘若
虜賊住套倉卒調兵糧草缺乏誤事非輕合
無行移戶部查勘延綏寧夏各緊要城堡并
陝西固原等處見在糧草除勾主兵支用外
可勾客兵幾箇月支用如有缺乏從長計議

差官整理預備底不臨期有誤

爲預防虜患事

臣等去年十月內具奏三事正欲宣大延寧四鎮總兵等官預知調用之法早備糧草以待兵動支用庶不臨期方來奏請失誤事機彼時河凍雖未曾開虜賊過河不過河雖未可知原擬預行號令整朔若虜不過河則迤綏聽大同調用如河開住套則宣大聽延綏調用不許早調虛費糧草亦不許後時失誤事機如此議擬雖似有一定之法而實有圓活之機先年失於預虞以致臨期奏調推託耽誤或賊情未動

調取太早坐費糧草今奉

聖諭河凍已開再行議處臣等再議得今河凍初開
虜賊過河不過河未探的確未曾奏來若直待哨探
的確奏來方纔定奪誠恐遲誤合無鋪馬賞文交與
各該鎮巡官仍照本部前擬從長計議如果相應依
擬分布隄備若別有長策難拘一定徑自隨宜施行
惟在謀筭預定逆折虜謀不敢深入斯稱委任如或
似常玩忽以致緩急無備失誤事機 國典具存必
難輕貸正德十三年二月十八日具題奉

聖旨是這預防虜患事宜恁每既議處停當着各該

鎮巡等官都依擬行欽此

爲強賊勢衆攻打衙門燒燬文卷街房劫搶財

物傷人等事

時鎮守太監廖堂打造帳房科害激變

看得巡撫陝西都御史鄭陽奏稱西安平涼鞏昌等府山陽隆德等縣強賊聚衆百人以上派打旗號流劫地方放火殺人皆因迫於饑寒隨地竊發各該官兵不能勦捕必須添撥兵力庶克濟事已行撫民叅議蘇乾守巡官叅政張橢僉事王忠巡捕都指揮張鵬霄等設法緝捕限二箇月以裏務要得獲等因臣等詳其奏內各賊起發踪跡似非一旦驟起之盜訪

得去年陝西地方頗爲豐熟都御史鄭陽旣稱前賊迫於饑寒所致自應設法賑恤弭患未然今賊已猖獗又延至二月有餘方纔奏報中間隱匿失事情弊難保必無所據鎮巡三司撫民守巡等官玩寇殃民通合查究及照前項聚衆流賊非止一處宜當急爲撫勦不可怠忽今奏雖稱督令守巡等官量調官軍緝捕觀其施爲似無警策賊若滋蔓必致誤事合無本部行文就令差來奏事人馬上賫回交與都御史鄭陽會同鎮巡三司官作急查議如前賊已就擒獲餘黨解散保無變動不必調兵若枝連蔓引勢益猖

獮本處官軍力不能制就照正德七年征勦洛川反
賊事例調固原遊擊將軍雍彬或調寧夏遊擊將軍
神揖統領人馬相機追勦以靖地方本部再行延寧
二處鎮巡官如遇巡撫陝西都御史鄭陽差人賁文
調取本鎮遊奇官軍依律調發會人策應不許阻誤
若遇本邊報有聲息重大兵難擅發另查應調官軍
督發應援巡撫都御史鄭陽嚴督三司并守巡等官
各照地方申明律禁撫安軍民禁止科害敢有不奉
朝廷明文擅科一錢擅起一夫逼迫小民從盜貽患
地方聽巡按御史并按察司官就便拏問叅奏治以

重罪應賑恤者量行賑濟招撫復業以絕盜源本部
再咨都察院轉行巡按陝西監察御史查勘奏內各
起賊情的於何年月日生發經過何處地方各劫財
殺人事情輕重并故違律例遲誤奏報及過限不獲
有罪人犯逐一查勘明白應住俸提問者就便住俸
提問應叅奏者指實叅奏提問通行回奏查考不許
遲延正德十三年四月初六日具題奉

聖旨是各該地方盜賊生發便鋪馬賞文着巡撫都
御史鄭陽會同鎮巡三司等官上緊查議處置不許
怠玩仍要嚴督所屬申明禁例撫安軍民不許科擾

尅害各項事情還着巡按御史查勘明白來說欽此
爲乞恩比例請勅分管地方事

看得御馬監太監黃玉奏要照潼關兵備副使張禴
事例管理東至陝州高盧永寧沔池縣弘農衛等處
西至同華二州等處南至商州等處北至蒲解二州
等處地方一節查得正德六年爲因河南地方叛賊
趙風子楊虎等聚衆數萬流劫郡縣鎮守陝西太監
王與慮恐流過潼關擾害陝西奏准暫設副使守把
關隘係一時權宜不爲經久及查各處地方設立鎮
守分守等項內臣俱有舊例潼關自洪武年間以來

不曾設有內臣分守今添黃玉分守又奏要管理近
關陝州等州縣地方緣陝州等州縣該鎮守河南太
監管轄同州華州等處該鎮守陝西太監管轄蒲州
解州等處該鎮守山西太監管轄今若又令黃玉通
管十羊九牧民必受害係是創行有礙

舊制事理關繫匪輕臣等受

朝廷重托職掌在此不敢擅便准擬況查居庸紫荆
等邊關分守太監亦止管理關口事件並無管理腹
裏州縣事例伏望

聖明俯念事體爲重將太監黃玉留待別處分守有

缺委用庶爲穩當正德十三年五月十七日具題奉
聖旨黃玉分守潼關准照副使張禴原轄地方管理
寫勅與他欽此

爲備禦虜患以保地方事

看得巡按陝西御史張文明奏稱正德十三年月日
不等節據夜不收報稱大勢達賊擁衆從花馬池入
到於韋州及固原等處搶掠及稱前項虜賊昔年大
舉侵犯固原深入平隴飽得而歸未遭一挫今又大
衆侵擾各邊切慮連年兵荒兵馬衰弱糧餉不敷要
將防禦兵馬合用糧餉從長議處先事區畫一節思

惠預防誠爲有見查得前項預防住套達賊侵犯事宜本部節次議奏事已周悉別無議處但恐陝西延綏寧夏等處鎮巡等官不行用心遵依急爲隄備必致失機誤事合無本部再行差人馬上賁文交與陝西延綏寧夏各該巡撫都御史會同鎮守太監總兵官查照本部前項節次議擬題奉

欽依內事理作急議處務在計出萬全事無一失應具奏者星夜差人奏請定奪如或因循遲延失誤事機聽巡按御史指實劾奏罪必有歸其所奏合用糧餉先事區畫一節本部雖已奏行鎮巡官查勘誠恐

往返遲延合無本部移咨戶部查勘該鎮各城保見
在糧草如果數少不設客兵支用作急議奏處置或
差官僨運庶不臨敵缺乏失誤軍機正德十三年五
月二十六日具題奉

聖旨是你部裏節次議奏預防虜患事宜還再行與
各該鎮巡等官都着依擬行不許遲延誤事該鎮糧
草缺乏戶部便議處了來說欽此

爲虜中走回男子供報夷情事

看得巡撫陝西都御史鄭陽奏要戶部查照原擬差
官一員無程前來整理軍餉惟復將陝西布政司開

納等項銀兩儘數留與本省以備兵糧之資一節合
咨戶部查奏定奪及看奏內開稱近又將兵部發下
馬價銀二萬兩那借運到固原糴買糧料一節切緣
馬匹糧草俱係重務都御史鄭陽擅將馬價銀兩那
移別用律合有罪合無本部移咨都察院轉行巡按
陝西監察御史查勘明白參奏定奪其奏要本部馬
上差人賁文延寧二鎮鎮巡等官知會將遊奇兵馬
聽從本鎮臨時會調刻期應援勦殺一節查得大同
延綏地方俱隣虜境中隔黃河所以先年舊例大同
延綏二鎮人馬料探賊在何處許令互相徵調相機

策慮若邊方萬一失守賊入腹裏在邊方者當設策以邀其歸在腹裏者當整陣以遏其鋒未有無事之時先議撤取邊兵退保內地之理也近年賊入山西三關大同總兵官葉椿擁兵入關尾賊之後無救於事及賊由花馬池等處入寇延寧人馬先調固原亦致失事皆徵調失宜戰守無策之所致也況都御史鄭陽既稱固原一帶每一城堡糧草不過一千餘石僅足支持主兵目前之用却要將延寧二鎮遊奇兵馬臨期調來應援揆之兵法俱有空碍難便准從合無本部行文延綏寧夏二鎮鎮巡官查照本部節

次題奉

欽依內事理逐一遵依分布要害設法防

禦隨宜調遣會合策應務使虜賊動遭剗不敢深入
久害地方萬一勢衆突入固原往南一帶搶掠務
要協同各路將官運謀合兵邀其歸路破其營壘以
決大勝不許遙望坐觀縱其出入自由互相推託各
圖倖免重罪其都御史鄭陽總兵官趙文亦要遵照
本部節次題奉 欽依內事理將原有人馬并合用
糧草預先整搦隄備運謀設法相機戰守其賊衆多
寡出入道路務要料探先知與寧夏二鎮領軍官互
相傳報彼此通知以便截殺若寧夏二鎮人馬四肢

不強藩籬不固而致賊深入縱橫自由陝西固原總兵巡撫官腹心無備保障無法而聽賊搶掠一籌莫展國典具存俱難輕貸正德十三年六月初六日具題奉

聖旨是這分布防禦隨宜策應并預備軍餉設法戰守等項事宜便各行與巡寧二鎮并陝西鎮巡官知道欽此

爲達賊節次入境官軍襲追對敵斬獲首級奪獲頭畜夷器等事

看得巡撫寧夏都御史王時中總兵官安國等奏稱

大虜犯境月無虛日累經移文徵調延綏奇遊官軍
前來交界地方住劄以便截殺延綏巡撫官因咨彼
處亦有大虜不肯督發乞要將宣大兵馬調赴延綏
延綏官軍移於寧夏再將固原遊兵那於韋州萌城
等處及將甘州奇遊兵馬統至交界城堡住劄遇賊
深入內外夾攻等因臣等查議得今年宣大邊外雖
有達賊其大勢俱在陝西套內延綏寧夏三邊雖有
達賊其擁衆深入爲寇多在延寧二鎮交界地方定
邊花馬池韋州萌城等處所以本部節次議奏禦虜
當謹分布事宜惟欲致謹於二鎮交界處賊必由之

處自春以來王時中安國等盡忠謀議遵依本部原
議分布副總兵路瑛等於前項要害之處果遇賊入
頗能拒遏隱然已有長城之倚而延綏鎮巡官乃敢
自分彼此故違 欽依事理不即督發又不火速奏
聞進止自由若以爲本處亦有大虜不知本處總兵
官副總兵所領人馬將何所用蓋是延綏總兵官戴
欽等尚不知本鎮與寧夏交界地方係虜賊常年出
沒之處宜當會合而乃任情自便畧無忌憚相應究
治但查未有失事况緊關用人合無本部行文切責
戴欽等務要洗心滌慮恪遵

成命將本鎮遊奇兵馬即日督發前去花馬池定邊營等處延綏交界地方隨宜住劄與寧夏所部將官同心合志哨探賊情互相傳報會合策應如仍故違已承調遣而違期不至或臨敵退縮故意逗遛因而失誤軍機依律叅問斬罪悔難追及其延綏本鎮地方達賊亦必深入聽總兵副總兵運謀設備相機戰守除宣府人馬聽候大同有事策應外本部馬上差人交與大同鎮巡官即將本鎮遊奇兵馬上緊督發過河聽延綏鎮巡官分布住劄以爲延綏本鎮之援及照甘肅土魯番事尚未寧息本部已有議奏存留

其涼備禦官軍前來固原聽總兵官趙文分布策應
合再馬上差人行文催取務要早到固原不許遲誤
其甘肅遊奇兵不必徵調預備肅州有事防禦及看
得安國等奏內要將固靖遊奇兵那於韋州萌城等
處一節尤爲有理若寧夏地方嚴謹賊不得過其固
原一帶自可保其無事但恐都御史鄭陽總兵官趙
文等亦如延綏鎮巡官自分彼此不即如約督發深
爲誤事合無本部亦於馬上賁文交與鄭陽等即便
照依安國等所擬督發固靖人馬前去韋州萌城等
處住劄候賊一入內外夾攻以取全勝如韋州等處

積有糧草并將取來甘涼等處備禦官軍一同督發前去庶得併力殺賊再照即目已交七月初旬田禾成熟虜賊若謀深入必在七月內外倘各鎮官員不知兵機最重仍復遲疑奏請必致債事乞降

勅旨叮嚀戒諭本部通行宣府大同山西延綏寧夏陝西甘肅八鎮各要遵守成筭同心協力共圖禦賊不許偏執自用致誤軍機如有故違聽本部該科并巡按御史訪察劾奏從重究治若以後事有變動該隨時制宜各聽從宜施行亦不可固執原擬致有乖違但能保固邊疆從違又當別議正德十三年六月

二十九日具題奉

聖旨是這分布策應等項事宜便行與各該鎮巡等官都着依擬行不許遲誤欽此

爲暫添將官以防大舉達事

看得巡撫陝西都御史鄭陽泰稱本鎮原無千總把總官員其固靖環蘭洮河岷西固階文等處設有守備都指揮陶文等尤員內陶文安靖不擾但謀勇不逮陝西鎮屬邊陲一千餘里非總兵官趙文一人所能獨理乞將革任副總兵鄭卿仍充副總兵前去固原協守及將都指揮張鵬霄等更替陶文守備一節

查得陶文先已自陳有疾該本部查得巡按御史常在奏保指揮趙瑛堪任將領推舉趙瑛更替陶文守備訖及查鄭卿先該郎中馬應龍奏稱固恤軍民窮極剝削頭目家人作弊百端又該巡按御史王光劾奏鄭卿擅動軍民採取木植等因已經革任及認罪回話免問又係副總兵例該會官推舉難准巡撫官一人所奏復用外臣等查議得延綏寧夏甘肅三邊各設武職大臣一員掛印充總兵官鎮守係是舊規陝西雖曾設有總兵官鎮守原無掛印其固原地方原無設有總兵等官弘治十四年爲因虜賊住套暫

設叅將一員分守固靖副總兵一員住劄固原遊擊
一員住劄慶陽以爲固靖等處聲援弘治十五年隨
將副總兵叅將裁革止留遊擊一員仍住慶陽及今
都指揮二員請

勅守備固原靖虜二處地方見今設有總兵官趙文
專在固原住劄又有遊擊將軍雍彬并固原守備趙
瑛靖虜守備周倫今若再設副總兵一員緣無設有
副總兵該管軍馬將何責任及照總兵官趙文既任
主將遇警出征部下必有親統官軍方稱委任今都
御史鄭陽奏稱本鎮原無千總把總官員不知趙文

所管何事合無本部行文馬上賫與總兵官趙文會
同巡撫等官計議即照各邊鎮守總兵官事體於固
靖等衛見有相應官軍內量選精銳官軍二三千員
名定委千總把總頭目親管操練整備軍火器械遇
有警報親自統領出征會合遊擊等項官軍相機截
殺如或遲違似常徒擁虛名嬰城坐視失誤事機罪
不輕貸再照延寧二鎮人馬專備花馬池等處邊警
不可預先調入腹裏退保固原若賊擁入固原往南
平涼等處搶掠其延寧人馬只可整陣養銳邀其歸
路亦不可尾賊之後以致不能追及但趙文該管各

城堡軍馬未見具奏實有若干除守城堡外應該調
集出征截殺精兵若干倘所管軍馬數少不敷調用
虜寇縱橫將何防遏查考先年虜賊住套將甘肅副
總兵魯鐸遊擊趙鉉官軍調來固原防禦又將秦筆
等衛原在甘涼備禦官軍存留固原以備截殺今照
甘肅事未寧息甘肅官軍難便調取合無將秦筆等
衛見在甘涼備禦官軍行文見該領班都指揮文書
到日即便盡數掣回置辦軍裝整點齊備作急統領
前赴總兵官趙文處定撥相應城堡住劄聽調殺賊
合用糧草馬匹軍器會同巡撫都御史鄭陽等作急

區處給付不許遲誤候虜賊出套事宜照舊甘涼備
禦仍相視地勢該用步兵拒守去處預備挨牌火器
設法拒守及行各府州縣衛所各將操守舍餘民兵
人等整點各自保守本處城堡先將選撥過人馬處
置過方畧回奏查考正德十三年七月初九日具題
奉

聖旨是這所奏事宜還行與鎮巡官看依擬行欽此
為黃河結凍事

看得巡撫陝西都御史鄭昉總兵官趙文奏要從長
定擬使延寧陝西三鎮合而為一有事則共捍其虞

失事則同當其咎如遇達賊入套延寧二鎮竒遊叅
協等兵各分布要害相機而待使賊前後左右無不
受敵等因今日禦虜方畧莫過於此誠為有見但前
項本部節次議擬奏准預防虜患事宜俱已詳備今
奏別無定奪合無就令原來人馬上賁文回還交與
陝西延綏寧夏各巡撫都御史會行鎮守太監總兵
官查照本部節次題准事理并令鄭陽趙文所奏方
畧遵依施行務在同心協力共保無虞敢有自分彼
此致誤事機貽患地方聽各該巡撫官互相糾奏從
重處治其奏稱師行糧食勢所不免即今倉場在在

空虛庫藏官銀查支殆盡乞要戶部差官雜買一節
即今調撥人馬雖多分布雖周若糧草無積臨敵缺
乏誤事非輕合無本部移咨戶部從長議處或差官
整理或別有處置作急具奏定奪正德十三年九月
十六日具題奉

聖旨是恁部裏節次奏行事理并鄭陽今奏事宜便
著令各該鎮巡等官都遵照施行毋致遲誤欽此

為大舉達賊擁衆深入官軍對敵斬獲首級奪

獲達馬夷器被虜人畜等事

時車駕幸榆林

看得叅稱大舉達賊擁衆入境搶殺及官軍對敵斬

獲首級等項事情先該鎮巡官節次具奏本部已經覆奏行巡按御史查勘及延綏鎮巡官故違

成命不發軍馬前去花馬池定邊營等處按伏防禦事情亦有巡按御史查勘外今巡撫陝西都御史鄭陽具奏前項賊情內稱延綏遊奇等兵先奉兵部明文分布延寧二鎮交界地方與寧夏所部將官同心合志互相傳報會合策應前賊進入既不會合出兵截遏又不差人傳報隄備以致前賊長驅腹裏一節臣等切詳今年虜賊住套犯邊寧夏鎮巡官安國等陝西鎮巡官趙文等皆能遵守

成命分布人馬用心隄備効力戰守惟獨延綏鎮巡官戴欽陳璘故違

成命不行依期調發軍馬會合策應以致失誤軍機殺害地方揆之法律合當重治合無請

旨切責戴欽陳璘令其從實回話本部仍咨都察院行催巡按陝西監察御史先將延綏鎮巡官遲誤督發延綏遊竒兵馬前去定邊營等處按伏失誤軍機一節上緊勘明具奏本部覆奏取自

上裁依律治以重罪以為後來不守紀律失誤軍機者之戒正德十三年九月二十六日具題奉

聖旨是欽陳璘故違成命不行依期調發軍馬策
應以致失事本當重治但地方有事之際姑記其罪
著勉圖後効再有違誤必不輕貸欽此

為黃河結凍事

看得巡撫寧夏都御史王時中奏要該部查照節次
原奏添將增兵催取羗漢班軍及於太倉收貯銀兩
將今歲年例之外不為常例再借十數萬兩并題開
事例從長議處早賜施行等因臣等自去年冬至今
年春節次議奏預防黃河套內虜賊侵犯事宜惟獨
寧夏巡撫都御史王時中總兵官安國等能着實舉

行竭力幹理號令嚴明分布周悉賊虜累次侵犯奮
勇奪斬未全得利但我兵寡不敵衆又軍餉急缺難
保必勝無敗今都御史王時中所奏俱係緊急軍機
務要相應急為議處除添設叅將調取軍馬事情本
部久已議題外候

命下之日即便差人賫文前去交與各官欽遵施行
其軍餉缺乏一節見今太倉銀庫空虛無從支給合
無本部移咨戶部速為議奏差官前去陝西將今年
夏秋稅糧該起運寧夏等邊收納糧草上緊儲運到
邊交納以濟急用如有遲違以致貽誤敵缺乏失誤軍

機依律將督餉官員治以重罪其領軍官有因糧策
缺乏失誤防禦者查勘明白准令分豁正德十三年
十月十四日具題奉

聖旨是欽此

為乞治貪懦從賊失事將官以謝全陝生靈等
事

看得兵科等科左給事中徐之縉等及山東等道監
祭御史王念等劾奏陝西總兵官趙文自任以來損
軍失事乞要將趙文先行拏解來京從重問罪太監
廖鑒都御史鄭陽罪亦難辭查勘究治另推久經戰

陳素諳韜畧將官一員馳代總兵之任一節先該本部查得往年大勢達賊在於陝西黃河套內住牧至秋必有擁衆入寇之舉預於去年十月以來前項節次議奏行迤綏寧夏陝西三鎮守臣分布人馬隨宜徵調設法預防及行戶部預備糧草後該巡撫陝西都御史鄭陽泰稱虜賊侵犯必由迤寧二鎮地方定邊營花馬池而入借使彼處力能攘却陝西固靖等處不過設備不虞而已本鎮人馬凋耗糧草缺乏乞要戶部差官整理軍餉及要本部行文迤寧二鎮如遇虜賊深心許調起軍遊擊兵馬應援該本部議奏

行延寧鎮巡官如遇虜衆深入固原一帶搶掠運謀
合兵邀其歸路及行鄭陽趙文與延寧二鎮官軍互
相傳報截殺鄭陽等又奏本鎮地方東西二千餘里
兵分勢寡戰守不敷延綏遊奇等兵不遵兵部明文
分布前賊進入既不會合出兵又不差人傳報以致
前賊長驅腹裏等因又該本部議奏行巡按御史查
勘外本年七月初三日奉

聖旨趙文不必動七月十四日大勢達賊從花馬池
深入臨鞏地方搶掠該巡按陝西延寧御史張文明
及巡按臨鞏御史羅玉前項奏報俱稱候查明另奏

其虜賊多寡出入道路搶掠數目及事干三鎮中間各官有無設備及失事輕重俱未查明叅奏見今陝西地方虜賊勢衆不時侵犯未見寧息合無將趙文做為事官行令戴罪殺賊聽候查考叅提仍照正德十年達賊侵犯固原事例奏差給事中一員候賊情稍寧請

勅前去會同彼處巡按御史吊取本部節次奏行預防虜患事宜及各該鎮巡等官節次具奏賊情原行案卷逐一查勘要見虜賊原有若干各於何年月日自何地而入何處鎮巡官可以設何法隄備而故不

設備何官已承調遣違期不至何官相應策應逗遛
不進何官所管軍馬足以禦敵而怯懦不出及各地
方被賊殺虜人畜多寡罪坐所由的係何官所致中
間有因賊衆兵寡勢不能敵或糧草缺乏兵難久住
以致失機俱要根究事實分豁明白內有能相機截
殺功可贖罪者亦要查議明白各不相掩其已經題
准預備軍餉故不處置以致臨敵缺乏失誤軍機尤
當依律從重叅究以戒將來趙文并廖鑾鄭陽等及
干碍追綏寧夏鎮守官并叅將遊擊分守守備等官
通行叅奏拏問究治務使罪必加罰而無故縱罰必

當罪而不濫及人心無不畏服將來亦知警戒不許
徇情輕忽致乖公議責必有歸正德十三年十月二
十三日具題奉

聖旨是趙文着戴罪殺賊以圖後効給事中不必差
去待地方賊情寧息着巡按御史備查各該官員功
過大小一併奏來定奪欽此

為強賊勢衆報讐劫獄搶擄人財燒燬城門等
事

看得巡撫陝西都御史鄭陽等所奏賊情係干城池
及聚衆百人以上劫獄放火殺人等項重情該管地

方官員平時不早設備以致臨事不能防禦俱合重
治及看得奏內開稱挑選官軍一千員名給與盔甲
器械委指揮張鵬霄統領副使孫脩監督前去勦捕
又行河南巡撫并撫治鄖陽各都御史及漢中府分
巡官各調兵把截處置似為得宜但詳前賊聚衆二
百餘人攻破縣治勢甚猖獗雖有都指揮張鵬霄所
領一枝官軍恐地方廣闊往來奔逸一時難以撲滅
及查得巡撫河南都御史李充嗣撫治鄖陽都御史
陳雍俱陞改別任接管者尚未有官合無本部行文
就令差來人馬上賫回交與巡撫都御史鄖陽等即

便嚴督各道守巡等官親詣該管地方督率軍衛有司量撥官軍民快設法隄備但遇追趕前賊到彼即便會合擒捕不許自分彼此坐視推託縱其奔逸其關南道撫民守巡等官并府州縣巡司等官照例住俸戴罪殺賊如能立功准贖前罪本部仍咨都察院火速劄付巡按河南湖廣各監察御史嚴督該道守巡撫民兵備巡捕等官整點官軍民壯如遇前賊流過一體防禦勦捕各將防禦過緣由回奏查考再行巡按陝西監察御史將關南道地方失事官員查照前例限滿不獲應提問者就便提問應恭奏者恭奏

提問若巡撫等官調度失策督理不嚴致賊滋蔓貽
惠地方聽本部劾奏從重處治正德十三年十月二
十四日具題奉

聖旨是這所奏事情便馬上齎文着都御史鄭陽等
嚴督守巡等官親詣該管地方設法隄備會合擒捕
仍行河南湖廣一體防勦不許怠玩其餘依擬行欽
此

為擒斬地方賊寇事

看得巡按陝西監察御史張文明先奏陝西布政司
撫治商洛叅議蘇乾等玩寇殃民曠職廢事有負委

任等因已該都察院覆題奉

欽依提問外今奏蘇

乾能激勵効勞督兵擒斬賊人賊級一十六名顆似
可以贖前罪及要將蘇乾仍提問罪別有定奪一節
查得蘇乾係添設專一撫民官員地方被賊攻破縣
治劫囚放火蘇乾不能預先設備禁治罪實難辭况
原奏流賊四百餘人今止擒一十六名顆奏內又自
稱餘黨尚存難保不復為患若依所擬就准蘇乾以
功贖罪不惟功少罪多無以示警抑恐人心怠玩前
賊復熾合無本部移咨都察院行巡按陝西監察御
史將蘇乾仍前住俸戴罪撫民捕盜如果再有擒斬

賊級地方安靖功可贖罪具奏定奪若日久不獲盜賊復生仍照原奉 欽依提問依律議擬照例發落
正德十三年十一月十一日具題奉

聖旨是蘇乾既有擒斬微功姑免提問還着照舊住俸戴罪捕盜待地方安靖之日奏來定奪欽此

為陳情乞恩分豁奏留官軍防守要害地方事
查得陝西寧羗漢中二衛官軍先年撥赴寧夏輪班備禦正以邊方軍少防禦為重所以遠調腹裏官軍輪班備禦非但為邊方之助亦以令腹裏官軍習知勤苦不至驕惰如河南山東山西官軍輪班前赴宣

大備禦河南官軍亦赴延綏備禦至如陝西腹裏西安等處官軍分撥前去延綏寧夏甘肅三邊輪班備禦俱係洪武永樂以來舊規皆以防邊為重限隔華夷使不內侵非細故也前項正德五六年間邊情寧息內地草寇生發所以建議者掣回漢中寧夏二衛寧夏備禦官軍在於故縣設堡屯戍以防盜賊乃一時權宜非謂經久不可動調也見今北虜大營住牧黃河套內擁衆數萬不時侵犯所以寧夏鎮巡官奏要將漢中寧夏二衛官軍照舊輪班赴寧夏備禦本部為料目前陝西虜勢猖獗京營并別省官軍尚當

調發併力防禦原在寧夏備禦官軍合當照舊督發
赴操及西安等衛備禦寧夏脫班官軍亦合查究以
此議奏題奉 欽依督發及將違誤官吏提問豈期

巡撫都御史鄭陽廢格不行半年之上未見督發咨
報今寧夏衛指揮王問卿漢中衛指揮王詔乃敢故
違 成命徑自具奏阻止惟知適已自便不顧失誤
軍機況正德七年新設故縣營係內有掣回西固城
備禦官軍并召募投充軍人其寧夏漢中二衛軍人
亦是輪班在彼近年漢中地方無事前項官軍中間
必被指揮王問卿等賣放歇役一聞調取通同受囑

捏詞破調所據王問卿王詔俱合究問合無本部行文巡撫都御史鄭陽嚴督該道守巡官親詣漢中寧羗地方查勘原額寧夏備禦官軍數內揀選精壯堪備戰守官軍不拘數目定為秋班照舊選委指揮等官管領定與限期督令赴寧夏鎮巡官處交割聽用其餘選定春班聽候明年凍開哨探虜賊如不過河一體赴邊備禦如賊已過河東照正德七年例存留本處故縣管堡防守不必赴邊仍令按察司分巡官將王問卿王詔提問依律議擬照例發落若查前項防守官軍如有贗放歇役等弊從重問擬施行巡撫

都御史鄭陽將督發過寧夏秋班備禦官軍數目并起程日期及取問過王問卿等招罪緣由通行回奏查考正德十三年十一月二十七日具題奉

聖旨是王問卿等姑免提問揀選官軍分班備禦等項事宜都依擬行欽此

為嚴武備以安地方事

看得巡撫陝西都御史鄭陽會同巡按御史羅玉議奏要於會寧地方添設守備官一員將臨鞏等衛調去各邊官軍量為存留在衛守城并將安定會寧金縣民快如法操練有事戰守及訪得指揮劉江黃宰

堪任守備一節臣等切詳都御史鄭陽因見今年安定會寧金縣被達賊搶掠故欲於其地添設官軍以為將來之備且見陝西固原軍馬路遠不能赴援之意但查臨鞏等衛備禦官軍內輪赴甘肅備禦者其來已久今年四月內本部議奏推用都指揮二員江山孫昌分管臨鞏等衛官軍各請

勅前去蘭州住劄輪流赴莊涼甘州等處備禦仍令都御史鄧璋揀選每班三千員名以待肅州有警從便調發巡寧人馬非遇大警不必動調今要量留安定會寧守城難以准擬及照各處守備官員能撫恤

軍士者少今若添設守備許令操練民壯難保必無
科害况虜寇深入動輒數萬縱使設一守備保守孤
城尚恐不能豈能抗敵強虜保無侵掠合無本部行
文巡撫陝西都御史鄭陽并巡撫甘肅都御史鄧璋
及各該巡按御史三司官并領班都指揮江山孫昌
等知會前項原定甘涼備禦官軍照舊在於甘涼備
禦若遇甘肅稍寧達賊在套住牧將備禦官軍暫留
本處備禦其官軍下班之時無事務要踈放休息不
許勾擾有事資給衣糧調取併力殺賊若河東河西
兩處有警酌量輕重取調不許各執已見致誤軍機

及領班都指揮原擬下班蘭州住劄今若那於安定
會寧住劄便於防禦聽巡撫都御史鄭陽等計議定
擬如果人情順便可以經久徑自依擬行令住劄若
有違碍照舊蘭州住劄不必更動其安定等縣民快
行令守巡官遇冬提督該縣官操練守城捕盜不許
私役及不時差占妨誤農業正德十四年三月初五
日具題奉

聖旨是欽此

為乞恩憫念地方民害事

看得蒲州民人李經等奏稱分守潼關太監黃玉提

官鎖吏擾害地方索取進貢銀二千六百餘兩小民
慌亂皆欲奔竊乞要將黃玉取回別用等情該兵科
官論說誠恐激變地方要將黃玉裁革拏來將千戶
梁堂等提問及將山西巡撫巡按等官叅究臣等竊
見今年

聖駕東巡喜峯口等處地方官員有乘機科索地方
者俱蒙

聖明洞察拏問究治臣民歡戴近日

聖駕西巡大同等處地方官員不聞有指以進貢為
由科銀千兩之上者今太監黃玉於一蒲州取進貢

銀二千六百餘兩其餘地方不知所取幾何若果李
經等所奏是實不無利歸於黃玉怨歸於

朝廷合無將黃玉取回不必添設其違法事情俱係
法司掌行本部不敢擅專定擬合行都察院查議差
官體勘奏請定奪正德十四年三月十五日具題奉
聖旨是黃玉且不取回軍民人等所奏事情亦暫免
查究今後着奉公守法鈐束下人毋令擾害地方如
違罪不輕貸欽此

為公務事

看得分守潼關太監黃玉奏要將巡緝寧夏備禦旗

軍調四本關操練一節先年為因邊境缺人防守腹裏地方軍多無用所以令其分班輪流赴邊備禦如河南山東等處官軍俱撥宣府大同極邊備禦山西官軍俱撥大同備禦陝西官軍俱分撥延綏寧夏甘肅三邊備禦河南官軍亦有撥去延綏備禦者不惟邊方得以資其用且使腹裏軍士習勤苦均勞逸不至驕惰無用行之百有餘年已有定規今太監黃玉創差守備又奏要創改舊例將潼關撥去延綏備禦官軍一千六百七十一員名寧夏備禦官軍一百四十七員名俱調四本關操練不知延綏寧夏為重潼

開為輕詳其本官之意不過欲為私役賣放之舉非有公心為

朝廷地方計也本官近該蒲州民人李經等奏稱科歛銀兩鎖提官吏地方不寧人心思亂等情兵科參論要將黃玉取回已該本部議擬具題外今奏要調回邊鎮備禦官軍關係事體重大擅難准擬正德十四年三月三十日具題奉

聖旨這事情重大你部裏再處了來說欽此

為添設墩臺保固地方事

看得巡撫寧夏都御史三時中等奏要皋州起萌

城止約二百七十餘里添築墩臺三十七座合用做
工人夫防護兵馬於遊竒按伏二枝并附近城堡軍
內摘撥待春暖興工墩軍於靈州所及各驛遠城堡
相兼差撥口糧於附近倉堡關支等因臣等議得添
墩瞭望預防虜患誠為有益但興動工役不免勞人
費財及各城堡當差軍人原有定數若每墩一座撥
軍十名該軍二百七十名此處旣添彼處必少又移
徙易置人情所難居處不安豈能經久事干創始似
難輕舉况即目交夏農務正忙合無本部行文都御
史王時中等再行計議如果興動工役保無他虞摘

撥旗軍兩無妨碍人情順便可以經久侍農隙之時
依擬興工陸續脩築通完之日具奏查考若計募兵
糧缺乏人難居守姑從照舊待豐年事寧再議定奪
不可執一徒致勞擾事無實效責必有歸正德十四
年四月初九日具題奉

聖旨是這地方墩臺應否添設還着巡撫等官再加
審覈務要停當方可施行欽此

為擒斬拒敵礦賊事

看得巡撫陝西都御史鄭陽奏稱礦徒聚衆在於地
名黃龍洞竊礦官軍追捕拒敵擒斬一十五人已行

官軍人等把塞洞中如遇前賊嘯聚為患夾攻追捕
務期殄滅以靖地方等因臣等竊詳小民聚眾竊礦
多因貧難不能過活意圖得礦少資用度以此不畏
法禁捨命竊取比與強盜聚眾劫財殺人者情犯不
同但不及早設法禁處未免致生他虞合無本部移
咨巡撫都御史鄭陽會同鎮守太監督同三司官計
議於黃龍洞上築立墩營二座置放砲火撥人輪流
看守遇有人民竊礦捉拏送官治罪若遇人眾舉放
砲火着令原設巡礦指揮等官率領官軍民快鄉夫
人等相機逐趕將為首之人擒拏問罪仍責委原設

撫民參議蘇乾往來巡察專理其事此外別有長策
具呈鎮巡官從宜處置不必拘執本部原擬如若似
前坐視因循以致弊端不塞殺傷人命貽患地方罪
必有歸仍令蘇乾將禁約略節緣由出給告示通行
附近礦洞地方張貼曉諭以前竊礦人犯俱不追究
今後洞口已設墩臺撥人守把及按伏兵快捉拏敢
有再來竊礦之人捉拏問罪照例枷號三箇月發邊
衛充軍同竊礦之人有能將為首人犯捕獲送官者
與免本罪待禁處畢日將礦賊有無生發緣由回奏
查考正德十四年七月初三日具題奉

聖旨是欽此

為預處邊患以安地方事

看得巡按陝西監察御史羅玉題稱洮州地方孤懸
極邊數年以來虜酋亦不剌部落侵入西寧西海漸
侵洮州等處城池墩堡日久坍塌勢難保障查得本
衛食糧官軍倉餘二千一百五十二員名內調涼州
備禦三百五十四員名固靖遊兵官軍四百六員名
本處分布東西北三路沿邊城堡防哨八百七十一
員名在城止存臨肇聽征官軍一百四十五員名紀
錄老幼三百七十九員名不堪差操况原無給領盛

甲又查主官胥成等所部民夫數雖六百盈甲完具者不過三百餘名不敷戰守要將選調涼州固靖備禦等項官軍掣回防守仍於腹裏衛所各行選補一節切照甘州孤懸河外固靖逼臨河套較之洮岷一帶尤為難守况撤回前項官軍節該各官論奏俱經本部議擬題奉前項 欽依係干政體難再別議合無本部移咨巡撫陝西都御史督令洮岷兵備副使會同守備官於本處衛所舍餘人等內各聽情願招募選補及遇有警聽將備禦下班官軍從權起調截殺厚加優恤賊退照舊休息不許無事勾擾致令逸

避責有所歸正德十四年九月十二日具題奉

聖旨是欽此

為達賊侵犯官軍追逐出境收送被虜走回男
子供報隣境賊寇那營事

省得巡撫寧夏都御史王_寺中等奏稱甘涼之賊轉
徙而北延綏達賊那營往西花馬池一帶四無險阻
慮恐不久冬臨河水結凍前賊糾合大衆入套戰守
不敷臨期奏請往迓月久未免誤事乞要議處將延
綏遊兵督發於安邊定邊營地方固原遊兵前來韋
州萌城各駐劄有警聽_臣等調用往來截殺庶不誤

事一節臣等議得陝西三邊地方廣闊虜賊侵犯最難防禦相應預為議處合無本部通行陝西延綏寧夏各該鎮巡官候河凍之後哨探虜賊大營如果入套住牧候春深草長勢將深入之時查照節年見行事理延綏遊奇人馬分布於安邊定邊花馬池等處緊要通賊去處設法防禦相機戰守固原遊兵臨時料度虜不一行准調韋州萌城住劄截殺若賊勢變動隨賊向徙相機應援不可拘執一法及無故妄調徒費糧草或相應調取失於約會及已承調違違期不至各因心失誤軍機並聽互相糾舉依律治以重

罪其甘肅遊奇兵馬并臨華一帶甘涼備禦官軍若
遇臨時甘肅事寧固靖有警查照本部節次題准事
理徵調前來固靖等處應援及宣大遊奇兵馬達賊
住套延綏有警亦照舊例聽延綏鎮巡官調取策應
俱不許自分彼此失誤軍機再照陝西固原一鎮軍
馬數少并各鎮合用軍餉缺乏俱聽各該鎮巡官及
早議奏區處庶有備無患地方幸甚正德十四年十
月初二日具題奉

聖旨是各邊遊奇兵馬着各依擬分布聽調應援不
許自分彼此致誤事機固原兵馬及各鎮軍餉着各

諸鎮巡官先事議奏處置欽此

為強賊勢衆挾雙劫獄搶虜人財燒燬城門等

事

議得先年為因陝西商洛等處地方與湖廣河南交界山深路僻流民聚集為盜布按二司分守分巡官不得常川在彼防守以此額外添設布政司叅議一員常在商州駐劄專一撫治流民禁捕盜賊今流賊聚衆二百餘人攻破商南山陽二縣劫庫劫獄殺死男婦八十餘名口虜去男婦二十餘名口失事重大皆叅議蘇乾不職所致及流賊二百餘人蘇乾失事

之後不過擒斬流賊卡四五名其賊首餘黨俱係河南兵備僉事閻欽等擒斬盡絕況指揮劉虎等已問死罪充軍知縣董儒楊章得蒙

聖斷革職為民國法大彰人心痛快若使蘇乾獨得以微功贖重罪誠恐無以示戒將來合無本部咨都察院行巡按陝西監察御史將蘇乾提問起送吏部查照才力不及事例奏請定奪仍先堆才幹官一員更替蘇乾撫民及看得前項奏勘招內開稱分守叅政翟敬出巡潼關分巡副使楊鳳之委邠州住劄防禦唐憲緣各官既有差占合無但免究問內楊鳳

雖有斬獲首級不多亦難論功及照副使孫脩都指揮張鵬霄俱不係該道官員領軍追賊斬獲首級一十四顆餘賊奔散勤勞可錄合無行巡撫陝西都御史將孫脩張鵬霄各以禮獎勵下手殺賊之人酌量給賞以勵將來再照巡撫陝西都御史鄭陽督率欠嚴以致撫民叅議蘇乾怠玩被賊攻陷孫治殺虜人民亦難辭責但查正德十三年七月達賊大舉入寇錢糧缺乏鄭陽往來固原竭力處置內顧自有不周合無免究以責後效正德十五年七月初一日具題未奉

助有

本

身

魂

奏

卷

五

絲

助有

本

身

魂

奏

卷

五

絲

晉溪本兵數奏卷五終

三

晉溪本兵數奏卷五終